

Mahlakuu  
18. päiv  
2024

Nummör  
8 (561)

Leht mass 1 €

# UMAPIDOLEHT

VANA - VÖROMAA RAHVA UMAN KEELEN LEHT

## Hillepi Einar: kost lätt ullusõ ja tarkusõ piir?

Kae lk 2

## Timahava tulõ mi kandin peris kirriv tiatrisuvi

Kae lk 3

## Üte tallõkõsõ üleskasumisõ lugu

Kae lk 4



## Noorõ saava umavaihõl tutvas

UL

**Kats timahavast Euroopa kultuuripääliina – Tarto Eestist ja Bodø Norrast – teivä ütidsõ ettevõtmissõ, miä avitas väikeisi kiili ja kultuurõ nuuril ütsoõsõga parõmbalõ tutvas saia.**

Tarto ja Bodø kuuntüüprojekt om mõtõld mõlõmba kultuuripääliina ümbre olõvidõ väikeisi kiili-kultuurõ nuuri ütehhaardmissõs ja kuuntüüle härgütämises.

Eestist võtva tegemissist ossa mulgi, seto ja võro noorõ ja Norrast saami noorõ. Käütäs ütstõsõl külän ja arotõdas, mille väikeisi kiili ja kultuurõ hoitminõ om tähtsä ja kuis tuu mõotas nuuri hindätiidmist. 14. mahlakuul peeti Tarton Eesti poolõ nuuri tutvassaamisõ ja plaanipidämise seminäri, kon umast kultuurist kõnõli ka võro noorõ.



LAANO TRIINU PILT

Võro noorõ Vodi Sirlen, Saarõ Hipp ja Oro Meeli näütäse nuuri tutvassaamisõ seminäril, mink poolõst võrokõsõ esierälidsõ omma.

## Vanast es tetä jüripääväl hobõsõga tüüd

Tulõva tõsõpääväl om jüripäiv. Midä tuu päiv mi kandi rahva jaos om tähendänü, tuu kotsilõ saa tsipa lukõ imäkeele seldsi 2005. aastagal vällä antust kogomigust «Kuiiss vanal Võromaal eleti».

1873. aastagal sündünü Nagla Jaan Vahtsõliina kihlkunnast Kärinä küläst om sääl jüripääväl kotsilõ kõnõlnu niimuudu: «Jüripääväl õigõt pühapäivä õs olõ. A tuu olf sääne päiv, õt sis rahvas liigi õks ütset paigast tõistõ. Kel õs olõ hindäl tallo, sis jüripäiv olf õks kõgõ tuu kolimisõpäiv. Kiä sis olf kas poolõteräkene vai jal rintnik. Mõni olf jal mõisamoonakõnõ. Sis olli mõisah tetü sântse moonatarõ, sinnä lätõ moonakõnõ sisse elämä. Käve mõisah tüühü ja sai säält moonapalga, vai kui sis kelgi tuu leping olf tett. Mõnõl olf kaubõld hindäle veitkese maad kah. Sis



ÕKVA MARGITI PILT

Jüripääväl vai jüripuulpääväl tetäs ka jüritud.

tuu sai säält veitkese aiavilja hindäle mano.

Jüripääväl õs tetä hobõstõga tüüd. Tuu olf kraamividämisepäiv, sis lasi nuu ka hobõsil

puhada, kiä esi kohegi tõistõ paikagi lää-s. Meil kõgõ õs lasta karja viil jüripääväl vällä. Ku õks süütä olf, sis õs lasta ni varra. Jüripääväl tetti õka tüüd, nipallo

olf õnnõ, õt jüripääväl ussaiah õs paugutõda. Õs tetä puulahkmiist vai ütsoõk määnestki säänest tüüd, koh olf vaia kloppi. Tuud õs tetä tuuperäst, õt muido pikne lüü suvõl majja.»

Umbõs 1870. aastagal sündünü Ortusõ Mari Räpinä kihlkunnast Veriora vallast om kõnõlnu nii: «Jüripäiv om katõlkünnendäl kolmadal aprillil. Jüripäiv olf hobõstõ pühä, sõs hobõsidega põllutüüd es tetä. Jüripäiv tuudeva sulasõ mano. Jüripäiv es raota puid ja es tetä aida. Jüripääväl tetti aiaist tull susi läbi. Jüripäiv laste kari edimäist kõrda vällä. Perremiis saaf kaifa värehteni ja ütõl eläjile takast: «Sitt ja kusi küläravalõ, piim ja või meele!» Ku karus karaga kodo tull, sõs valõte timmä viiga ja ante tälle ütõ keedetõ kanamuna, et suvõl kaifa mano makama ei jäässe.»

UL



Võro kiränduse klassiku Adsoni Arturi sündüst sai timahava 135 aastakka.

## Opilaisi oodõtas Adsoni Arturi avvos luulõt lugõma

Opilaisilõ mõtõld ja Adsoni Arturilõ pühendet luulõlugõmisvõistlus tulõ kesknädäli, lehekuu 8. pääväl (8.05) kell 11 Sännä kultuurimõisan. Hää luulõlugõja saava avvohinna.

Võistlusõl võiva luulõtuisi lukõ kõigi Vana-Võromaa kuulõ ja latsiaidu latsõ. Egä lugõja kand ette üte pala – Adsoni Arturi vai mõnõ tõsõ kirotaja võrokiilse luulõtusõ. Lugõmisõ

pikkus ei või olla üle viie minodi ja luulõtus piässi olõma pään. Hindaminõ käü nellä vannusõrühmä perrä: latsiaia ja 1. klassi latsõ, 2.–4. klassi, 5.–9. klassi ja 10.–12. klassi opilasõ. Egäst latsiaiaist ja koolist oodõtas ekkä vannusõrühmä kattõ ütõsikut esinejät vai sis ütõ kooni viie liikmõga rühmä.

Ossavõtmissõst ütõn täpsõmbä teedõsõga lugõja kottalõ (nimi, vannus/klass ja kuul/latsiaid, oppaja, luulõtusõ päälkiri ja kirotaja) tulõ teedä anda Võro instituuti (tel 517 5174 vai kadriugur@wi.ee) ildampa 3. lehekuu pääväs (3.05).

Adsoni Arturilõ (1889–1977) pühendet umakeelidsõ loomingu ettekandmissõ võistlusõ mõtõ om edimäst suurt võrokeelist luulõtajat miilde tulõta. Edimäne luulõlugõmisvõistlus olf Sännän 1999. aastagal Adsoni 110. sünnüaastapäivä avvos.

Seo aasta om plaanin ka tsillõkõnõ tüütärõ Adsoni luulõtuisi parõmba mõistmissõ ja lugõmissõ kottalõ.

Päivä kõrraldasõ ja tugõva Võro instituut, MTÜ Sännä Kultuurimõis, Eesti Kultuurkapital ja OÜ Isejutt.

UL

**UMA PIDO**

VÖROKEELINE LAULU- JA RAHVAPIDO  
1. JUUNIL KL 18  
PÖLVAN INDSIKURMUN

PILET? PILETILEVIN  
UMAPIDO.EE

**Keelepesältsil om vahtsõnõ jutu- ja ülesandõraamat.** Valmis om saanu raamatukõnõ, kon kõnõldas latsiaia egäpäivävelõst juttõ ja saa lahenda ülesandit. Väiku viguriga jutu ja juhtumissõ niimuudu, nigu noid näge keelepesätsirk, om kirja pandnu Laanõ Triinu ja ülesandõ noidõ mano om vällä märknü Fastõ Mariko. Raamadu kunstnik ja kujondaja om Luiga Kristjan. Jutukogo and vällä Võro instituut Eesti rahvakultuuri keskusõ tugõmissõl.

Raamadu keelepesätsirgu juttõga saava latsõ, kiä käävä keelepesärühmän. Nuu omma rühmä, kon oppaja kõnõlõsõ latsiga võro kiilt.

UL



## Pühapäivä peetäs võrokõisi kongressi käräjät

Võrokõisi kongressi vanõmbidõ kogo kuts kõiki kullõma ni arotama, mis saison omma võrokõsõ aastak päält edimäst võrokõisi kongressi! Tuud tetäs Võro Kandlõn 21.04 kellä 12–16 käräjil. Kõnõldas, kuis om edenü kongressi otsussidõ elloviimine, määndse omma edesiminegi Nursipalu küsümisen ja miä saa edesi võro keelest, Vana-Võromaa kul-

tuurist, hariduselost ni miä omma kuumõmba teemä, miä võro verd värisemä võtta püüdvä.

Päält ettekandit ni kõnõlustõõri tähüstedäs kongressi aastapäivä kontsõrdiga, kon astva üles võro laulja ja laululuuja.

Ligembät teedüst löüd interneti kodolehe vorokongress.ee päält.

UL





